

Partenz, Grischun Central e valladas dal sid

Territoris natirals protegids en il Grischun, part 1

■ La Pro Natura Grischun tgira varga tschient territoris protegids. Quests territoris ed objects cumpiglian tant craps erratics e singulas plantas sco era territoris d'ina grondezza da plirs kilometers quadrats. I sa tracta concretamain da zonas umidas, plazzas da frega dals amfibis/puzs, palids bassas ed autas, prads sitgs, territoris per la protezzion da las plantas, reservats da guaud, geotops, plantas e da cuntradas cultivadas protegidas. Ils territoris èn u en possess da la Pro Natura u stattan sut contracts da lunga durada.

Sin la pagina d'internet da la Pro Natura Grischun vegnan preschentads duresch dals territoris protegids. En quests territoris hai sendas da viandar en u enturn ils territoris, uschia ch'els èn adattads per visitar. Auters territoris èn memia pitschens u memia sensibels per supportar ina massa da visitaders.




Lai da Stels (Aschera/Schiers e Luzein)

A la fin dal davos temp da glatsch han forzas naturalas pussantas creà las premisas per il svilup dal Lai da Stels. Oz sa distingua il lai alpin amuraivel entras zonas da terrenisaziun preziasas ed ina ritga fauna e flora.

Avant pli che dieschmilli onns, cura ch'ils gronds glatschers han cumenzà a luar, ha il Lai da Stels cumenzà a sa furmar. Il glatscher luà ha laschà enavos in rempar da morena e davos quel è l'aua stagnada ad in lai. Quest lai primar era considerablamain pli grond che oz.

L'aua che sbucca dal lai è sa maglià adina pli profund en la morena, uschia ch'il lai è sa svidà plaun a plaun. Pir cura ch'il flum è vegnì sin in fund da grip ha el chalà da defluir. La sbuccada da l'aua ed il rempar da morena èn anc oz perdirtas bain visiblas en la cuntrada.

La creschientscha constanta e la piriuziun da las plantas d'aua e da riva han chaschunà zonas da terrenisaziun circularas da differenta grondezza e vegetaziun. A quest'atezza sur mar proceda la



Survista dals territoris che vegnan preschentads sin la pagina d'internet da la Pro Natura.

CHARTA: PNG

terrenisaziun mo enfin ad ina tscherta profundità da l'aua e fitg plaun. Cunquei ch'il lai è vaira profund en il center, è la surfatscha averta dal lai strusch sa midada en il decurs dals davos decennis.

Il Lai da Stels è enconuscent per sia diversità d'insects. Ins po observar qua libellas raras sco la libella da palì u la libella blava ad asta. E tar las plantas pon ins registrar baininqual record: sper la nimfa alva crescha era la schervetta entretschada nagliur en il Grischun en ina tala autezza sco al Lai da Stels.

Prads da muntogna dad Obermutten

Ils prads sitgs cun lur gronda varietad da spezias en l'abitadi gualser Obermutten èn in dals lieus nua che creschan las pli bieras paradisias en il Grischun.

Tranter la Val Alva e Valragn giaschan a la costa sid da la Muttner Höhi ils culms

da Mutten. La stad dattan en egl sin quests prads sitgs la paradisica (Paradisea liliastrum). Questa spezia da gilgia perclitadada potenzialmain crescha là en in dumber impressiuant. Sin ils prads sitgs da Mutten creschan era differentas spezias d'orchideas. Tuttina sco la paradisica èn era tut las spezias d'orchideas protegidas en Svizra. Sco regla generala vala: pli bieras spezias d'orchideas ch'ins vesa sin in prà, pli auta è la diversità florala. En ils prads da Mutten creschan nov differentas spezias d'orchideas. Questa cumposiziun da las spezias dat als prads sitgs in'impurtanza singulara sin plaun chantunal. Il temp principal da fluriziun èn ils prads da muntogna da Mutten in vair daleg, betg mo per ils visitaders, era las tgirallas, ils avieuls selvadis ed auters insects chattan qua ina funtauna ritga ed excellenta da nectar e pollens.

La flora en la regiun protegida variescha tenor il cuntegn d'acid dal terren. Ils terrenes sura, pli planivs, cuntegnan dapli acid a la surfatscha. Perquai creschan surtut prads da tschorf aeri cun bieras flurs. En las parts confinants pli spundivas chatt'ins plitost spezias da plantas che prefereschan terrenes basofils sco per exempel il traifegl-balsam. Sur vastas parts da l'intschess protegì datti en il prà sitg indicaturs d'acid e da basa. Quai è d'attribuir al sutterren. La plattamorta grischuna è in'unitad geologica eterogena e cuntegna, tut tenor ils sediments, rasadas cun plitost blera chaltschina u bler quarz.

En tschertas parts vegnivan ils prads ladads u pasculads anc avant paucs onns. Ils prads che vegnivan cultivads gia pli baud sco prads da segar possedan oz ina pli gronda diversità da las spezias. La Pro Natura s'occupa, ensem cun ils purs, da la tgira optimala – utilizaziun estensiva – per mantegnair e promover la diversità da la flora.

Cuntrada umida Alp Flix (Sur)

Entras la cultivaziun estensiva durant tschientaners è sa furmà sin la terrassa alpina da l'Alp Flix ina palì e cuntrada cultivada che cumpiglia palids autas e bassas, prads da fain e pastgiras.

Il glatscher dal Bernina ha sutterrà l'Alp Flix avant 10000 onns sut ina stresa da glatsch da 1000 meters grossezza ed ha furmà foppas e collinas. Entras il squitsch enorm dal glatscher è il fund vegnì stuppà da tala maniera ch'el è vegnì bletsch ed igl èn sa furmadas cun il temp palids.

Ils onns 1350 èn sa chasads Gualsers sin l'Alp Flix. Els han runcà ils gauds da

schembers per gudagnar terren da pascul. Entras la cultivaziun estensiva durant tschientaners è sa furmada ina cuntrada cultivada unica cun pastgiras e prads, separadas ina da l'autra entras mirs sitgs. En il lieu d'extracziun «Gruba» han ins plinavant explotà fin en il 19avel tschientaner minerals da fier e d'arom.

Oz abiteschan quatter famiglias sur onn sin l'Alp Flix. La stad survegnan ellas cumpagnia da 160 arments e vatgas, 250 nursas ed intginas chauras. La particularità da questa cuntrada po vegnir conservada mo entras purs da muntogna che cultiveschan il terren estensivamain e cun quità. Ils prads da las palids bassas vegnan segads per impedir ch'els creschian en.

Reservat da guaud Val Cama – Val Leggia (Mesauc)

Il reservat da guaud tanscha da 450 m s.m. enfin al cunfin dal guaud a 2200 m s.m. La gronda part dal reservat da guaud natiral garanteschia entras il process da protezzion il svilup natiral e dinamic dal guaud senza intervenziun umana. En ils reservats da guaud spezialis cuntinuescha u vegn reintroducì l'economia d'alp tradiziunala cun pasculaziun. Qua tras vegn era promovì la diversità da las cuntradas cultivadas mez avertas cun lur plantas ed animals. Ins ha constatà almain 24 differentas societads da guaud. Il spectrum tanscha dal guaud da vertinets, da chastagners e da ruvers fin a gauds d'ischis,ogna, faus, pigns e lareschs ed als urs dal guaud plantadis da zundrins; ina ritgezza immensa. Il process da protezzion pussibilescha da survegnir conuschientschas davart il svilup da societads da guaud betg utilizadas, surtut a la fin dal svilup dal guaud e da la vita da las plantas al sid da las Alps. Als viandants sa porschan vistas ed invistas romanticas en gauds situads en boas e chavorgias cun plantas romusas imposantas, ma era cun laina morta sidretg u per terra.

Las trais valladas èn avertas mo cun sendas da viandar, vias na datti naginas. Ina particularità è era l'Alp de Lagh en la Val Cama: Dapi l'onn 2004 vegn l'alp puspè chargiada cun vatgas, chauras, nursas, portgs pailus e giaglinom. Notabene veglias razzas d'animals da niz – ins ha numnadamain creà in'alp da ProSpecieRara, sustegnida dal Fond svizzer per la cuntrada.

Reservat d'avnauns glazialas Malögia

En il territori da Malögia datti in'accumulaziun unica sin plaun europeic da 36

avnauns glazialas grondas e pitschinas. Ellas furman in geotop d'impurtanza regiunala. Plinavant datti en il territori protegì palids autas (d'impurtanza nazionala), in guaud da tieus alpins ed ina interessanta vegetaziun da grip. A partir da la tur panoramica Castello Belvedere han ins ina survista impressiuanta sin l'Engiadina e la Bergaglia.

Crests smuttads da gnais e da granit caractereschian il pass dal Malögia sin 1800 m s.m., gist sut il cunfin dal guaud. Ina vaira serra da la val manca qua al cunfin superiur da l'Engiadina. Enstagl croda il terren vers vest en ina spunda stippa bunamain 400 meters giuaden en la Bergaglia.

La vasta val da l'Engiadina cun sias cuntradas da lais è ina furmazion tipica dal davos temp da glatsch. Dal massiv dal Bernina culavan imposantas massas da glatsch sur il pass dal Malögia vers vest. La foppa da la val Bergaglia è sa furmada gia pli baud entras l'effect d'erosiun dal flum Maira.

En ils onns tschuncanta dal 19avel tschientaner han ins scuvert en la regiun avnauns glazialas, numnadas en talian «marmite». Vers il 1880 ha il cont beltg Reness costruì il chastè da Belvedere ch'è però prest daventà ina ruina pervi da las difficultads finanzialas dal cont. Lonn 1953 ha la Pro Natura pudì acquistar il territori; ils davos onns ha quel anc pudì vegnir schlargià. La tur dal chastè che porscha in grondius panorama ha l'uniun da traffic puspè rendì accessibla.

Il Rom (Val Müstair)

Il Rom è in dals pli bels flums principals d'ina val en Svizra. Nagin'ovra idraulica retegna sia cursa, sias pradas magnificas èn restadas per la gronda part intactas ed èn vegnidas revalitadas ils davos onns. Il spazi dal flum è vegnì schlargià generusamain sur lungs tschancuns, uschia ch'el ha ussa puspè set leg originar. La liturgia d'aua indigena chatta danovamain in spazi da viver ideal ed a las rivas s'extendan magnificas pradas da flurs e cuntradas cun saivs vivas.

Per pudair scuvert il Rom d'atgna iniziativa ha la Biosfera Val Müstair stgaffi cun agid da la Pro Natura Grischun la senda tematica signalisada «A la riva dal Rom». La spassegiada sin la senda tematica cumenza a la funtauna dal Rom a Tschier e maina enfin al cunfin talian. Ins passa palids bassas, viandescha lung las rivas naturalas dal flum, surmunta parts stippas da l'aua e passa tras zonas alluvialas abitadas da dialas misteriusas. E tgi che vul savair danunder che l'aua da funtauna vegn, munta si tar las dolinas da l'alp da Munt e descenda da là giu en il territori da la funtauna.

La senda tematica «A la Riva dal Rom» è in divertiment per pitschen e grond: lev da chaminar, cun bieras pussaivladads da far in paus, dus plazs da giu cun fuaina directamain sper l'aua e numerusas ustarias en ils vitgs en vischinanza da la ruta.

Ultra da quai è vegnì creà in «lavoratori d'experientschas sper l'aua» che permetta d'experimentar la fascinaziun da la cursa natirala da l'aua cun uffants da scola. En il lavoratori pon ils uffants lavurar e giugar sper l'aua sut la directiva da scolastas e scolasts u da manaders da gruppa e far experiments per scuvert munds zuppads da l'aua. Cun agid da texts e gieus pon els emprender d'enconuscher l'aua sco element vital ed exercitar in'utilizaziun responsabla da l'aua.

La presentaziun:
Dossier «Territoris protegids».

Dapli infurmaziuns:
chatta.ch/?hiid=3650
www.chattà.ch



Tavla en quatter linguas dal territori protegì sper il Lai da Stels, Aschera

FOTO: PNG